



Ordinaziun da sepultura e santeri

C u n t e g n

I. Determinaziuns generalas	3
Art. 1 Dretg surordinau	3
Art. 2 Pleiv	3
Art. 3 Persuna da contact	3
Art. 4 Register da fossas	3
Art. 5 Cavar e cuvierer fossas	3
Art. 6 Formaziun dallas fossas	4
Art. 7 Manteniment dils santeris	4
Art. 8 Rumida dallas fossas suenter scadenza dil temps da ruaus	4
Art. 9 Crusch ni monument	4
II. Determinaziuns pertuccont fossas ordinarias	5
Art. 10 Mesiras e distanzas dallas fossas	5
III. Determinaziuns pertuccont fossas d'urnas	5
Art. 11 Fossas dad urnas a Rabius e Sumvitg	5
IV. Determinaziuns pertuccont mortuaris	5
Art. 12 Fossas dad urnas a Surrein	5
Art. 13 Mortuari vegl	6
Art. 14 Mortuari niev	6
Art. 15 Ornaments	6
Art. 16 Taxas per ils mortuaris	6
V. Determinaziuns pertuccont fossas communablas	7
Art. 17 Fossas communablas	7
Art. 18 Ornaments per la fossa communabla	7
Art. 19 Inscriziun dalla fossa communabla	7
Art. 20 Controlla dalla fossa communabla	7
Art. 21 Taxas per satrar en fossa communabla	7
VI. Determinaziuns finalas	8
Art. 22 Approbaziun e vigur	8
VII. Annexa	9

Sebasond silla lescha da sepultura e santeri (740.000) dalla vischnaunca da Sumvitg relai la suprastanza communal la suandonta ordinaziun.

I. Determinaziuns generalas

Art. 1 Dretg surordinau

Las prescripziuns dalla lescha da sepultura e santeri ston vegnir risguardadas.

Art. 2 Pleiv

¹ La pleiv Sumvitg ei responsabla per il manteniment ordinari dil santeri tenor art. 7 da questa ordinaziun.

² La pleiv Sumvitg sa relaschar atgnas disposiziuns executivas pertuccont il manteniment ordinari dils santeris. Determinaziuns digl uorden executiv dalla pleiv che cunterfan alla lescha communal e questa ordinaziun ein buca valeivlas.

³ La pleiv elegia ed indemnisescha il persunal per la lavur da manteniment ordinari dils santeris. Ella fixescha ils pensums dil persunal enteifer lur disposiziuns executivas.

Art. 3 Persuna da contact

Sco persuna da contact denter la pleiv e la vischnaunca funcziunescha il president dalla pleiv sco representant dalla pleiv ed il cau dil ressort santeri sco representant dalla suprastanza communal.

Art. 4 Register da fossas

¹ Il register da fossas vegn menaus dall'administraziun communal.

² Ils plans da santeri ston cuntener el minimum num, prenum, onn da naschientscha, onn da mort dil defunct e localisaziun dalla fossa.

Art. 5 Cavar e cuvierer fossas

¹ La lavur da cavar e cuvierer la fossa vegn exequida entras ils collaboraturs communal.

² Ils cuosts per quella lavur per defuncts cun davos domicil en vischnaunca da Sumvitg van per grevezia dalla vischnaunca. Ils cuosts per ils defuncts ch'ei buca domiciliai en la vischnaunca da Sumvitg cun lubientscha speciala da satrar tenor art. 8 dalla lescha da sepultura e santeri vegnan adossai directamein als vegnentsuenter dil defunct.

³ La taxa per cavar e cuvierer las fossas munta per:

- a) fossas da carschi frs. 500.--
- b) fossas d'affons frs. 400.--
- c) fossas da barets frs. 200.--
- d) fossas d'urnas frs. 150.--

Art. 6 Formaziun dallas fossas

La formaziun dallas fossas ei caussa dils vegnentsuenter e sto succeder en concordanza cun la suprastanza dalla pleiv sil pli tard dus onns suenter la sepultura. Las fossas ston haver ina crusch ni in monument. Las particularitads dils santeris ston vegnir risguardadas.

Art. 7 Manteniment dils santeris

¹ Sco manteniment ordinari tenor art. 11 al. 1 dalla lescha da sepultura e santeri valan lavurs che serepetan periodicamein (sco p.ex. tener uorden, segar pustgets, dismessa da neiv pil diever ordinari dil santeri sco era per sepulturas, dismessa da curdems, chisar vias, zerclar etc.) ed ein necessarias pil diever e pil maletg dil santeri. La pleiv vegn indemnizada persuenter cun ina pauschala annuala da frs. 9'000.--.

² Sco manteniment extraordinari tenor art. 11 al. 2 dalla lescha da sepultura e santeri valan principalmein la construcziun ed il manteniment da mirs, seivs entuorn il santeri, furniziun da material per ulivar las fossas e material per il manteniment ordinari, sco era la rumida da neiv en cass da grondas nevadas, cun consentiment dil cau da ressort santeri.

³ Manteniment extraordinari pigl onn proxim ei da comunicar alla suprastanza communal ni al cau da ressort santeri sil pli tard el settember digl onn current, sinaquei che l'executiva communal sappi risguardar quella expensa el rom dil preventiv.

Art. 8 Rumida dallas fossas suenter scadenza dil temps da ruaus

¹ Las fossas vegnan rumidas suenter sil pli tard 24 onns cun resalva da situaziuns extraordinarias tenor leschas surordinadas. La rumida ei caussa dils vegnentsuenter.

² La rumida dallas fossas cuntegn dismetter la rama, il monument ni la crusch, igl ulteriur uorden dalla fossa ed igl ulivar terren.

³ La vischnaunca exequescha quella lavur sin damonda tenor art. 20 dalla lescha da sepultura e santeri cun adossar ina taxa per la lavur da frs. 150.-- als vegnentsuenter.

⁴ Giavischan ils vegnentsuenter da salvar la crusch ni il monument, ston els procurar il transport naven dil santeri. Il transport entras la vischnaunca succeda mo sin damonda e cun adossar ils cuosts tenor tariffas da vischnaunca als vegnentsuenter.

Art. 9 Crusch ni monument

¹ El santeri da Rabius duei vegnir tschentau ina rama ed ina crusch ni in monument cun l'inscripziun dil defunct.

² El santeri da Sumvitg duei vegnir tschentau ina rama ed ina crusch cun l'inscripziun dil defunct.

³ El santeri da Surrein duei vegnir tschentau sin las fossas ordinarias ina crusch cun l'inscripziun dil defunct.

II. Determinaziuns pertuccont fossas ordinarias

Art. 10 Mesiras e distanzas dallas fossas

Per mantener la formaziun dils santeris ston las suandontas mesiras tier las fossas vegnir risguardadas:

	santeri Rabiuis	santeri Sumvitg	santeri Surrein
a) lunghezia dallas fossas	1.40 m	1.30 m	tenor cavafossa
b) ladezia dallas fossas	0.60 m	0.50 m	tenor cavafossa
c) altezia monuments	1.30 m	-	-
d) altezia dallas cruschs	1.30 m	1.30 m	1.30 m
e) ladezia monuments	0.60 m	-	-
f) ladezia dallas cruschs	0.60 m	0.60 m	0.60 m
g) distanza denter fossas	0.30 m	0.40 m	tenor cavafossa
h) ladezia dallas vias	0.95 m	1.00 m	tenor cavafossa

III. Determinaziuns pertuccont fossas d'urnas

Art. 11 Fossas dad urnas a Rabiuis e Sumvitg

¹ Las fossas d'urnas els santeris da Rabiuis e Sumvitg vegnan preparadas cun ina rama circumdonta.

² La taxa per satrar urnas en la fossa d'urnas preparada munta frs. 600.--.

³ Per mantener la formaziun dils santeris ston las suandontas mesiras tier las fossas d'urnas vegnir risguardadas:

	santeri Rabiuis	santeri Sumvitg
a) lunghezia dallas fossas	0.80 m	0.70 m
b) ladezia dallas fossas	0.60 m	0.50 m
c) altezia monuments	0.70 m	-
d) altezia dalla crusch	0.70 m	0.90 m
e) ladezia monuments	0.40 m	-
f) ladezia dalla crusch	0.40 m	0.50 m
g) distanza denter fossas	0.30 m	0.40 m
h) ladezia dallas vias	0.80 m	1.00 m

IV. Determinaziuns pertuccont mortuaris

Art. 12 Fossas dad urnas a Surrein

¹ El santeri da Surrein stattan per sepulturas dad urnas dus mortuaris a disposiziun.

² Las nischas d'urnas vegnan serradas cun plattas da crap che la vischnaunca metta a disposiziun.

³ Vegnan las fossas allontanadas ni nischas d'urnas sligiadas duei la tschendra ord las urnas vegnir satrada dignamein ella proxima fossa che vegn cavada si ni ella fossa comunabla. La platta dalla nischa vegn surdada alla famiglia dil defunct.

Art. 13 Mortuari vegl

¹ Las plattas el mortuari vegl survegnan in'inscripziun cun num, prenum, onn da naschientscha ed onn dalla mort dil defunct.

² Sur l'inscripziun vegn fermu ina crusch ni in auter simbol ch'indichescha la religiun ni la confessiun. Mintga platta dil mortuari ha naven dall'entschatta ina crusch.

³ Sper l'inscripziun astga era vegnir fermu ina fotografia dil defunct. La rama per la fotografia metta la vischnaunca a disposiziun. L'emprema inscripziun ei da posizunar aschia ch'ei ha aunc plaz per ina secunda inscripziun.

⁴ La crusch (ni auter simbol), l'inscripziun e la fotografia ston esser unificadas. Las plattas vegnan montadas entras la vischnaunca suenter la sepultura. La fotografia e l'inscripziun san era vegnir montadas pli tard.

Art. 14 Mortuari niev

¹ Las plattas el mortuari niev survegnan in'inscripziun cun num, prenum, onn da naschientscha ed onn dalla mort dil defunct.

² Sur l'inscripziun vegn fermu ina crusch ni in auter simbol ch'indichescha la religiun ni la confessiun. Mintga platta dil mortuari ha naven dall'entschatta ina crusch.

³ Sper l'inscripziun astga buca vegnir fermu ina fotografia dil defunct. L'emprema inscripziun ei da posizunar aschia ch'ei ha aunc plaz per ina secunda inscripziun.

⁴ La crusch (ni auter simbol) e l'inscripziun ston esser unificadas. Las plattas vegnan montadas entras la vischnaunca suenter la sepultura.

Art. 15 Ornaments

¹ Mintga nischa el mortuari vegl dispona dad ina fotografia dil trapassau e mintga fossa el mortuari niev dispona d'in plaz per ina candeila ni in matget. Construcziuns stablas ni fotografias astgan buca vegnir fermadas vid la tabla dalla fossa.

² Tier la sepultura astgan fluras e tschupials vegnir deponi davon ils mortuaris (ev. indrez da pender si tschupials). La dismessa da fluras e tschupials ei en responsabladad dalla famiglia dil defunct.

³ A caschun dils dis dallas olmas, d'autras fiastas da baselgia ni per ornament astga vegnir mess mo ina candeila ed in matget sil sem ni silla platta dils mortuaris. La grondezia sto esser aschia ch'ella cuviera buca l'inscripziun.

⁴ Giun plaun avon il mortuari vegl astga buca vegnir mess fluras auter che a caschun dalla sepultura.

Art. 16 Taxas per ils mortuaris

¹ La taxa per igl emprem plaz ella nischa cun platta ed inscripziun munta per defuncts cun davos domicil en vischnaunca frs. 2'200.-- e per defuncts cun davos domicil ordeifer la vischnaunca frs. 2'500.--.

² La taxa per il secund plaz ella nischa cun inscripziun munta per defuncts cun davos domicil en vischnaunca frs. 1'000.-- e per defuncts cun davos domicil ordeifer la vischnaunca frs. 1'500.--.

³ La taxa per la rama dalla fotografia el mortuari vegl munta per tuts defuncts frs. 100.--.

V. Determinaziuns pertuccont fossas comunablas

Art. 17 Fossas comunablas

Els santeris da Sumvitg, Rabius e Surrein ein ni vegnan fossas comunablas per sepulturas messas a disposiziun. Las fossas comunablas stattan era a disposiziun per defuncts cun lubientscha speciala che han buca giu domicil en vischnaunca da Sumvitg il mument da lur mort.

Art. 18 Ornaments per la fossa comunabla

¹ Duront e suenter ils dis da sepultura astga vegnir deponiu fluras ed in simbol da cardientscha el liug destinau persuerter sper la fossa comunabla. Sil pli tard suenter treis meins dueien tut las fluras ed auters ornaments da fossa vegnir allontanai entras ils vegnentsuenter.

² Ornaments da fossa e fluras ch'ein seccadas ni ch'ein vegnidas macortas, ein d'allontanar.

³ Ei dat negina pusseivladad da crear in simbol individual sin la fossa comunabla.

Art. 19 Inscriziun dalla fossa comunabla

¹ La tabla da regurdientscha cuntegn num, prenum, onn da naschientscha ed onn dalla mort dil defunct. La tabla vegn plazzada sin las plattas da crap sil pli tard treis meins suenter la sepultura.

² Per defuncts che vulan restar anonims en la fossa comunabla vegn desistiu d'ina inscripziun e d'ina tabla da regurdientscha.

Art. 20 Controlla dalla fossa comunabla

La vischnaunca meina ina controlla dallas urnas satradas.

Art. 21 Taxas per satrar en fossa comunabla

¹ La taxa per satrar urnas en la fossa comunabla munta frs. 1'000.-- per defuncts cun davos domicil en vischnaunca e frs. 1'500.-- per defuncts cun davos domicil ordeifer la vischnaunca.

² En quella taxa ei cumpriu il derscher ora la tschendra ella fossa e l'inscripziun silla tabla da regurdientscha.

VI. Determinaziuns finalas

Art. 22 Approbaziun e vigur

¹ Questa ordinaziun ei vegnida approbada dalla suprastanza communal ella seduta dils 23-10-2017 e passa en vigur ensemen cun la lescha da sepultura e santeri ils 01-01-2018.

² La revisiun parziala dall'ordinaziun da sepultura e santeri ei vegnida approbada dalla suprastanza communal ella seduta dils 22-04-2024 e passa en vigur ils 01-05-2024.

Il president communal

sig. Patrick Schaniel

Il canzlist communal

sig. Fabian Collenberg

VII. Annexa

Survesta da taxas

Taxas per cavar e cuvierer las fossas per defuncts cun davos domicil ordeifer vischnaunca (art. 5 al. 3)

a) fossas da carschi	frs. 500.--
b) fossas d'affons	frs. 400.--
c) fossas da barets	frs. 200.--
d) fossas d'urnas	frs. 150.--

Taxa per rumir fossa (art. 8 al. 3)

- Taxa per rumir fossa	frs. 150.--
------------------------	-------------

Taxa per satrar en fossa d'urnas preparada els santeris da Rabius e Sumvitg (art. 11 al. 2)

- Taxa per satrar en fossa d'urnas preparada	frs. 600.--
--	-------------

Taxas per ils mortuaris el santeri da Surrein (art. 16)

- Taxa per emprem plaz ella nischa cun platta ed inscripziun per defuncts cun davos domicil en vischnaunca	frs. 2'200.--
- Taxa per emprem plaz ella nischa cun platta ed inscripziun per defuncts cun davos domicil ordeifer vischnaunca	frs. 2'500.--
- Taxa per secund plaz ella nischa cun inscripziun per defuncts cun davos domicil en vischnaunca	frs. 1'000.--
- Taxa per secund plaz ella nischa cun inscripziun per defuncts cun davos domicil ordeifer vischnaunca	frs. 1'500.--
- Taxa per rama da fotografia el mortuari vegl	frs. 100.--

Taxas fossas comunablas (art. 21 al. 1)

- Taxa per defuncts cun davos domicil en vischnaunca	frs. 1'000.--
- Taxa per defuncts cun davos domicil ordeifer vischnaunca	frs. 1'500.--